

Convocatoria conxunta da Dirección Xeral de Xuventude e Solidariedade e da Dirección Xeral de Ordenación e Innovación Educativa pola que se organizan actividades de sensibilización e participación en accións de voluntariado e solidariedade nos centros educativos de ensinanza non universitaria para conmemorar o Día Internacional do Voluntariado.

A Dirección Xeral de Xuventude e Solidariedade e a Dirección Xeral de Ordenación e Innovación Educativa desexan convocar actividades que den resposta ás seguintes necesidades:

- Fomentar o voluntariado, consolidando unha cultura de solidariedade entre o alumnado.
- Fomentar a colaboración interdepartamental e ofrecer novos proxectos de traballo nas aulas que potencien o uso das novas tecnoloxías (TICS) en materia de solidariedade.
- Promover unha maior difusión dos traballos realizados que estimule a implicación e sirva de referente para outros centros.
- Impulsar a realización de actividades que potencien a implicación activa do profesorado e do alumnado.

Con este motivo, acordan realizar a convocatoria conxunta na que propón o desenvolvemento de actividades que teñan por obxecto fomentar a sensibilización e a participación en accións de voluntariado e solidariedade en dúas modalidades:

- Modalidade Libro web colaborativo.
- Modalidade realización de graffitis.

## Modalidade Libro web colaborativo

A Dirección Xeral de Xuventude e Solidariedade e máis a Dirección Xeral de Ordenación e Innovación Educativa ofrécenlle ao profesorado e ao alumnado dos centros educativos un espazo web para a realización dun libro colaborativo sobre experiencias en voluntariado e solidariedade para conmemorar o día Internacional do Voluntariado.

Un libro web colectivo é un espazo para o traballo común onde cada coautor pode publicar a súa páxina e nela escribir os seus propios textos, corríxilos e modifícalos e máis ilustralos con imaxes, comentar os suxeridos ou introducidos polo profesorado e polos compañeiros e compañeiras, etc. Aqueles que queiran participar nesta convocatoria terán á súa disposición unha ferramenta que lles permitirá publicar o seu traballo sen necesidade de coñecementos informáticos.

### Artigo 1º.- Obxecto da convocatoria

Será a invitación ao alumnado dos centros de ensinanza non universitaria Para participar en actividades de sensibilización en accións de voluntariado e solidariedade. O libro web poderá usarse con propósitos diferentes e axustarse aos distintos niveis educativos (como caderno de bitácora en que o alumnado comente os artigos, as ideas, os textos... suxeridos polo profesorado; como lugar de publicación de traballos do alumnado, individuais ou colectivos, etc.). Os contidos deberán versar sobre o eido da solidariedade e o voluntariado: experiencias neste ámbito: comercio xusto, etc.; as entidades de acción voluntaria; os diferentes ámbitos de actuación do voluntariado: social, medioambiental, etc.

### Artigo 2º.- Persoas destinatarias

Poderá solicitar a súa participación todo o profesorado de ensino secundario da Comunidade Autónoma coa finalidade de crear un libro con un ou máis grupos de alumnos e alumnas do segundo ciclo da ESO (como máximo 25 alumnos/as).

### Artigo 3º.- Solicitud de participación

Cada centro ou grupo de alumnos/as que desexe participar deberá ter cadanseu profesor ou profesora responsable dos contidos colgados no libro. Este deberá seguir o procedemento que se indica a continuación para solicitar a súa participación:

1. Do día 1 de outubro ao 15 de outubro poderá pedir espazo para o seu libro enviando unha mensaxe dende a súa conta de correo persoal do dominio edu.xunta.es ao enderezo [contidos@edu.xunta.es](mailto:contidos@edu.xunta.es) . Nesta mensaxe deberá indicar:
  - O seu nome completo.
  - O seu DNI.
  - O seu centro de destino.
  - O nivel educativo a que irá destinado o libro.
  - O título deste, que non deberá ter máis de 30 caracteres. A administración do concurso incluírá na portada do libro o título e autor/es.
  - Un breve prólogo ou texto introdutorio, que a administración do espazo web colocará na primeira páxina do libro, en que explique cal vai ser o contido concreto e a orientación do libro.
2. Nun breve espazo de tempo, o/a solicitante recibirá unha mensaxe de resposta cun nome de usuario e un contrasinal co que el/ela e mais o seu alumnado poderán entrar no asistente para a creación do libro que se encontra no enderezo: <http://www.edu.xunta.es/contidos/libros>.
3. Se o solicitante for profesor ou profesora dun centro privado non concertado e non tiver conta edu, deberá enviar igualmente unha mensaxe dende a súa conta persoal ao enderezo [contidos@edu.xunta.es](mailto:contidos@edu.xunta.es), pero a resposta co nome de usuario e o contrasinal chegaralle por correo ordinario ao seu colexio. De ser profesorado dun centro sostido con fondos públicos e non ter conta edu, deberá solicitala previamente dende o web: <http://www.edu.xunta.es/correo>. O profesorado dos centros concertados deberá remitir previamente o documento “centrosprivados.doc” (modelo anexo II) que atopará no enderezo <http://www.edu.xunta.es/xade/descargas/centrosprivados.doc>.

#### Artigo 4º.- Proceso de publicación

- A partir do día 15 de outubro, e ata o 15 de novembro, cada docente, co grupo de alumnos/as de que se faga responsable, poderá acceder ao asistente de creación de libro web co nome de usuario e co contrasinal que lle foron asignados.
- Unha vez dentro da aplicación, na sección “Libros” do menú da esquerda, deberá escoller o seu libro, que figurará co título proposto. Só poderá engadir páxinas a un libro propio. De engadir páxinas nun libro alleo, non se publicarán e o seu contido será eliminado.
- Cando se seleccione o libro correspondente, aparecerá a portada, onde ha figurar o seu título e os seus autores, amais do índice, en que inicialmente se verá o prólogo, así como o resto de páxinas, poderán ser modificadas polos autores seleccionándoa e premendo na pestana “editar”.
- Para crear novos capítulos ou páxinas, deberá colocarse na portada do libro e premer sobre ela ou no título. A continuación, deberá pulsar co rato na opción “engadir páxina filla” e encher o formulario que aparece na pantalla. Terá que cubrir obrigatoriamente só os campos precedidos por asterisco. Para asegurar a correcta colocación das distintas páxinas do seu libro, o campo título deberá comezar por un dígito do 01 ao 99 que indique o número de capítulo de que se trate. No campo “corpo” existe a posibilidade de introducir texto e mais imaxes. Non debe esquecer premer no botón “enviar” antes de abandonar o asistente.
- Os contidos creados serán moderados. É dicir, non serán visibles no web ata ser aprobados polo administrador do espazo web. Nun breve prazo de tempo, o administrador da consellería de Educación e Ordenación Universitaria autorizará a publicación da nova páxina, que poderá verse no ordenador e imprimirse xunto co resto do libro. Tamén se poderán ver os libros elaborados por outros centros educativos.
- O administrador do espazo web moderará os traballos tendo en conta os seguintes criterios:

- A lingua utilizada deberá respectar as normas ortográficas aprobadas pola RAG no 2003.
- Os libros non poderán incluír publicidade de empresas, produtos ou servizos comerciais nin imaxes de menores.
- Os contidos non poderán ser ofensivos nin discriminatorios e deberán empregar unha linguaxe non sexista.

No URL do concurso <http://www.edu.xunta.es/contidos/libros> , no bloque de “Axuda”, dispón dunha sinxela e completa axuda a modo de libro modelo titulada “Como facer un libro”.

Disporá no mesmo URL dunha caixa de correo a través da que poderá enviar as súas suxestións ou preguntas, que lle serán respondidas no seu correo electrónico.

- O profesor ou profesora responsable de cada libro elaborará a súa publicación tendo en conta:
  - A adecuación ao tema proposto.
  - A calidade e orixinalidade dos traballos presentados.
  - O respecto á lexislación vixente en materia de propiedade intelectual (para máis información sobre isto, cfr. O punto 7, “Propiedade intelectual”, das “Recomendacións para a redacción e deseño de páxinas web” que se encontran no enderezo <http://www.edu.xunta.es/contidos/guia boas practicas/> )
  - A consideración dos requisitos que terá en conta o moderador do espazo web para autorizar a publicación das páxinas.

#### **Artigo 5º.- Difusión e recoñecemento**

Os cadernos ou libros colectivos seleccionados serán recoñecidos con premios e difundidos ao resto da comunidade educativa a través do Portal Galego de Contidos educativos, <http://www.edu.xunta.es/contidos/portal> e do web da Dirección Xeral de Xuventude e Solidariedade: <http://voluntariadogalego.org>.

A presentación a esta convocatoria implicará, no caso dos traballos premiados, a colaboración nas accións de difusión que se organicen, así como a cesión a favor da Dirección Xeral de Xuventude e Solidariedade e a Dirección Xeral de Ordenación e Innovación Educativa dos dereitos de edición.

No caso de que os autores decidisen publicar por outras vías os traballos premiados, deberán solicitar o permiso correspondente. De ser a resposta positiva, na publicación deberá constar expresamente o premio de que foi obxecto.

Os autores e as autoras quedarán comprometidos a realizaren as modificacións precisas nos documentos finais para que poidan ser publicados total ou parcialmente no formato máis adecuado.

**a. Categorías**

Establécense dúas categorías:

- Para aqueles libros cuxos contidos vaian dirixidos ao ensino de terceiro e cuarto curso da ESO.
- Para aqueles libros cuxos contidos estean dirixidos ao ensino de 1º de bacharelato.

**b. Número e contía dos premios:**

A Dirección Xeral de Xuventude e Solidariedade concederá:

- Un premio por cada unha das categorías, consistente na participación no programa AUGAMAR, programa de educación e promoción do voluntariado ambiental sobre o litoral e o medio mariño que se leva a cabo no Albergue Xuvenil “As Sinas”, en concreto, no subprograma “Da Areagorda ao Mar Maior”. Deberán ir acompañados dun profesorado opcional ou dun monitor do programa. As datas de participación serán elexidas polo centro, tendo en conta o calendario establecido para a realización do programa, o cal terá lugar entre os meses de abril e xuño, de luns a venres.

- A entrega do premio farase en acto público o día 5 de decembro, coincidindo co Día Internacional do Voluntariado.

**c. Comisión de selección:**

Para o fallo dos premios establecerase un xurado formado por:

- O director Xeral de Xuventude e Solidariedade ou persoa en quen delegue.
- A directora xeral de Ordenación e Innovación Educativa ou persoa en quen delegue.
- A xefa de servizo de Solidariedade.
- A xefa de Servizo de Ordenación e Innovación Educativa.
- Un asesor ou asesora técnica encargada dos contidos educativos.

A comisión poderá dispoñer a constitución dunha subcomisión técnica especializada para colaborar na valoración daqueles proxectos que coide pertinentes.

**d. Criterios de valoración:**

A comisión seleccionará os traballos premiados tendo en conta os seguintes aspectos:

- Carácter innovador e orixinalidade da proposta.
- Traballos que favorezan a difusión dos valores que humanizan e constrúen unha sociedade distinta á actual, sensibilizando nos valores da solidariedade, a paz, a xustiza, a tolerancia e a igualdade.
- Introducción de elementos que axuden a coñecer o mundo do voluntariado e a solidariedade entre os mozos.
- Nivel de implicación e incidencia na comunidade educativa.
- Corrección lingüística do texto da proposta.

**e. Resolución:**

A decisión do xurado farase pública na segunda quincena do mes de novembro e a relación de premiados e mais os seus traballos serán publicados no Portal Galego de Contidos Educativos <http://www.edu.xunta.es/contidos/portal/index.htm> , así como na web da Dirección Xeral de Xuventude e Solidariedade <http://www.voluntariadogalego.org>.

## Modalidade realización graffitis

### Artigo 1º.- Obxecto da convocatoria

Convocar un premio para a realización dunha intervención gráfica- graffiti que se ocupe de difundir entre o alumnado os valores do voluntariado e a solidariedade.

### Artigo 2º.- Persoas destinatarias

Poderán participar todos os centros de ensino secundario, bacharelato e formación profesional, da Comunidade Autónoma, para os seguintes cursos:

- 3º e 4º curso da ESO
- 1º de Bacharelato
- 1º de Formación Profesional ( primeiro do ciclo formativo de grado medio )

### Artigo 3º.- Prazo de presentación

Os proxectos deberán ser presentados ata o 15 de novembro de 2008 ás 15:00 horas.

### Artigo 4º.- Solicitud de participación

1. Cada centro educativo interesado en participar deberá enviar á Dirección Xeral de Xuventude e Solidariedade ao enderezo <http://www.voluntariadogalego.org/graffiti> unha mensaxe na que deberá indicar:

- Nome do centro de ensino.
- CIF.
- Localidade.
- Nome e apelidos do profesor/titor.
- Un arquivo adxunto onde se reflexe o deseño que se desenvolverá o día 5 de decembro, este arquivo debe ser jpg ou pdf, e non deberá de superar os 1, 5 MB.
- As necesidades de materiais para a realización do graffiti.

Esta web estará activa durante o prazo previsto para a entrega dos deseños.

2. De entre todas as propostas presentadas seleccionárase unha por provincia.

### Artigo 5º.- Difusión e recoñecemento

A presentación a esta convocatoria implicará, no caso dos traballos premiados, a colaboración nas accións de difusión que se organicen, así como a cesión a favor da Dirección Xeral de Xuventude e Solidariedade e a Dirección Xeral de Ordenación e Innovación Educativa dos dereitos de edición.

No caso de que os autores decidisen publicar por outras vías os traballos premiados, deberán solicitar o permiso correspondente. De ser a resposta positiva, na publicación deberá constar expresamente o premio de que foi obxecto.

- a. Número e contía dos premios:

A Dirección Xeral de Xuventude e Solidariedade concederá:

- Un premio a cada centro educativo de acordo cos niveis educativos que se recollen no artigo 2º, consistente na participación no programa AUGAMAR, programa de educación e promoción do voluntariado ambiental sobre o litoral e o medio mariño que se leva a cabo no Albergue Xuvenil “As Sinas”, en concreto, no subprograma “Da Areagorda ao Mar Maior”. Deberán ir acompañados dun profesor opcional ou dun monitor do programa. As datas de participación serán eleixidas polo centro, tendo en conta o calendario establecido para a realización do programa, o cal terá lugar entre os meses de abril e xuño, de luns a venres.

b. Comisión de selección:

Para o fallo dos premios establecerase un xurado formado por:

- O director xeral de Xuventude e Solidariedade ou persoa en quen delegue.
- A xefa de servizo de Solidariedade.
- A directora xeral de Ordenación e Innovación Educativa ou persoa en quen delegue.
- A xefa de servizo de Ordenación e Innovación Educativa.
- Un asesor ou asesora técnica encargada dos contidos educativos.

A comisión poderá dispoñer a constitución dunha subcomisión técnica especializada para colaborar na valoración daqueles proxectos que coide pertinentes.

c. Criterios de valoración:


A comisión seleccionará os traballos premiados tendo en conta os seguintes aspectos:

- Estética.
- Traballo colaborativo.
- Traballo previo e posterior de aula.
- Que se traballen os contidos voluntarios a través de intervención artística.

A Dirección Xeral de Xuventude e Solidariedade proporcionará os materiais necesarios para a realización do graffiti.

d. Resolución:

A decisión do xurado farase pública na segunda quincena de novembro na páxina web <http://www.voluntariadogalego.org/graffiti>, e o graffiti realizarase nos centros educativos premiados con anterioridade ao día 5 de decembro, Día Internacional do Voluntariado.



Santiago de Compostela, 25 de xuño de 2008.

O director xeral de Xuventude e  
Solidariedade,

A directora xeral de Ordenación e  
Innovación Educativa,

Rubén Cela Díaz

M<sup>a</sup> José Pérez Mariño